



## D GNIESSER 2017

### Sujet: Mir luegen ewägg !

Wenn d Larve nit graduus dien gnaisse  
het das e bsund're Zwägg;  
Es ghöört zem Sujet und duet haisse:  
Mir luege halt ewägg !

"Me luegt ewägg" isch Moode worde  
für Kinder, Frau und Maa.  
Me höört vo ganz Menschehorde:  
"Y lueg ewägg, mii goot s nüt aa..."

Mir möchte dorum ganz konkreet  
so Byschpiil doo benenne;  
Und froogen Euch drum ganz diskreet,  
ob Ihr Euch drin erkenne ?

Stygt e Frau in d Yysebaan  
mit Koffer und Gepägg,  
het dää, wo hälfe könnt e Plaan:  
Är luegt diskreet ewägg.

Heerscht anstatt "Freude", diggi Luft  
höört me, wien e Feigling sait:  
"S isch besser, wenn y doo verduft,  
denn mir isch das so lang wie brait."

Gänn zwai sich Schnitten in dr Stadt  
und hängge Schletterlig sich aa,  
denn saagen alli kurz und glatt:  
"Y lueg ewägg, mii goot s nüt aa !"

Lauft me an en Unfall aane,  
sait me betroffe "grauevoll"  
und hofft, dass ändlig – nundefaane –  
doo "irgend öpper" hälfe soll.

Und sott e Maa dr Huushalt mache  
gseet äär weder Staub no Drägg.  
Är sait sich denn: "Bi dääne Sache  
lueg y lieber grad ewägg !"

Döört, wo si Doping-Pille schlugge  
gscheet das mit beschtem Gwüsse,  
wil d Kontrolleur sich feig verdrugge;  
die *wänn* vo däm nüt wüsse.

Und kunnt ain uff die Glanzidee  
bi dr FIFA d Konti z checke,  
denn wird galant das übersee;  
döört *wott* me nüt entdegge !

Gseesch am Färnsee Flüchtling lyde  
saisch lakoonisch "Ooh, wie dumm,  
das Eländ miess me doch vermyyde"  
...und schaltet denn uff d Sportschau um...

Hänn Sii und Är e Rendez-vous,  
(zem Byschpiil s Beetli mit em Ändi);  
denn luege sii bim Interview  
sich statt ins Gsicht, uff s Handy !

Und hüült e Kind, wil s Gläpper griegt  
und git und git kai Rueh,  
denn hofft me, dass dr Schmäärz verfliegt  
und hebt sich d Oore zue.

Im Dschungelcamp frisst d "Prominänz"  
ain e Maade, ain e Schnägg.  
Nur döört, bi soo vvyll Dekadänz  
luegt me gschyyder ganz ewägg.

Isch e Fründ vo Dir in Noot,  
schrybt me gschwind en SMS:  
"Y hoff, dass es bald besser goot,  
rächt vvyll Glügg, y bi im Stress..."

Wäärde Fraue Daag und Nacht  
vo bööse Männer schikaniert,  
wird ewägg gluegt und s wird glacht;  
schliesslig haig *sii* provoziert.

Ligt Dyy Noochber grangg im Bett  
und muesch ihn dääglig lyde gsee;  
Denn isch me froh, dass *äär* das hett  
und luegt ewägg und sait "Ohjeeh".

Hüt fäält s dr Gsellschaft an Respäggt,  
s goot vvyll z vvyll um Profit;  
D Wält isch vo Egoismus prägt,  
s isch e Zaiche vo dr Zyt.

Und hitten isch s au laider soo  
(dasch s Änd vom Zeedeltäggscht):  
E jeede Mensch isch noodinoo  
sich sälber zeerscht dr Näggscht...

Drum bitte mir Dii – nundefaane –  
lueg statt ewägg, vo jetz aa: Aane !

*Aber gäll, an dr Ladäärne-Uusstellig uff em Minschterplatz  
luegscht uff kai Fall ewägg. Döört MUESCH aaneluege !*